

崔東壁遺書

洙泗考信餘錄目錄

卷一

顏子

曾子

顏子幾於聖人曾子有傳道之功故先之

閔子騫

冉伯牛

仲弓

子貢

閔冉皆德行名賢推尊孔子子貢為最故次之

卷二

子路

有子

原思

公西華

子賤

子游

子夏

子張

宰我

冉有

子羔

樊遲

司馬牛

漆雕開

公冶長

南容

卷三

左子

子思子

自及門諸賢後傳道者子思有功於春秋者左子故
特錄其實事於門人後

附錄十有二人

孔門弟子通考

洙泗考信餘錄卷之一

大名崔述東壁謹考

石屏門人陳履和校刊

顏子

補顏無繇字路。路者顏回父。父子嘗各異時事孔子。史記仲

列傳

史記以顏路曾皙皆孔子弟子。考之論語。曾皙有侍坐章可據。顏路則無明文。然即使果孔子弟子。亦不可列於其子之後。又未便列於七十子之前。故今倣正錄之體。冠於顏子篇首。以誌毓德之由。曾皙倣此。

補顏回者魯人也。字子淵。同上

按顏氏著於魯者多。史記以為魯人近是。至言少孔子三十歲。則與世家所載伯魚之年不合。必有一誤。大概

史記之年。皆不足據。故今諸弟子。皆不載其年。說詳後弟子通考中。

顏子當亂世。居於陋巷。一簞食。一瓢飲。人不堪其憂。顏子不改其樂。孟子子

附論○子曰。賢哉回也。一簞食。一瓢飲。在陋巷。人不堪其憂。回也不改其樂。賢哉回也。論語雍也篇

附論○子曰。回也其庶乎。屢空。論語先進篇

韓詩外傳云。顏淵侍魯定公於臺。東野畢御馬於臺下。定公曰。善哉。東野畢之御也。顏淵曰。善則善矣。其馬將佚。俄而廐人以東野畢馬佚聞云云。余按此事本出呂覽。乃顏闔對莊公語。非顏淵與定公也。定公之時。顏子尚少。安能自達於君。馬之佚不佚。小事耳。顏子亦非以

此見長者。因其氏之同也。遂移之於顏淵。誤矣。新序亦載此事。蓋又緣外傳而誤者。然觀呂覽之文。亦非實事。乃為黃老言者。假設此事。借治馬以喻其意。欲為政者之安靜無為耳。故曰。禮煩則不莊。令苛則不聽也。傳乃以為實事。且欲借此以增顏子之美。而不知其視聖賢太小也。故不載。

子畏於匡。顏淵後。子曰。吾以女為死矣。曰。子在。回何敢死。同上家語云。孔子厄於陳蔡。七日不食。子貢竊告糴於野人。顏回炊之。有埃墨墮飯中。取而食之。子貢望見之。以為竊食也。入告孔子。子曰。吾將問之。召顏回曰。疇昔予夢見先人。子炊而進飯。吾將進焉。對曰。有埃墨墮飯中。回食之。不可祭也。云云。余按聖人以誠待人。況於顏淵。用

舍行藏之所同也。乃詐稱夢以鈎距之。賢者猶不出此。况聖人乎。顏淵具體而微。而不能不以竊食見疑於子貢。子貢智足以知聖人。曰。賜也。何敢望回。而不能不以竊食疑顏淵。有是理與。此其師友之間。相猜相試。初無異於今日屠沽駟僧之徒之所為。屠沽駟僧之徒。或猶有恥為之者。而以加於聖賢。嗚呼。此豈復有人心者哉。此事本之呂覽。而詞與此小異。然呂覽之意。不過明知人之難。目見者猶不足為信。詳見呂覽任數篇託於孔子。顏子以為言耳。家語遂以為真。謬矣。吾故曰。家非孔氏語遺書也。偽也。家語較之世家。其文尤陋。然世儒之信家語。尤甚於世家。韓昌黎云。小慚亦蒙謂之小好。大慚亦蒙謂之大好。嗚呼。果有是理乎。

顏淵問仁。子曰。克己復禮為仁。一日克己復禮。天下歸仁焉。為仁由己。而由人乎哉。顏淵曰。請問其目。子曰。非禮勿視。非禮勿聽。非禮勿言。非禮勿動。顏淵曰。回雖不敏。請事斯語矣。

論語顏
淵篇

按聖門之學。莫要於求仁。聖門之人。莫賢於顏子。乃孔子告顏子之問仁。以此。則是天下之理。更無有高於此。遠於此者也。後儒不求之此。乃好言心性。尤好求心性於虛空微渺之間。是以其論益精。而其於行事益無所當。馴致良知頓悟之說。因緣以起。而吾道之不流為禪學者。幾希矣。豈知理無精粗。而功有深淺。淺之可以寡過。而深之即足以極深研幾。顏子之如有所立卓爾。固皆自約我以禮來也。吾願世之學者。篤信孔子之言。而

勿務為高遠難徵之說以自誤也。

附論○子曰吾與回言終日不違如愚退而省其私亦足

以發回也不愚

論語為政篇

附論○子曰回也非助我者也於吾言無所不說

論語先進篇

附論○子曰語之而不惰者其回也與

論語子罕篇

顏淵問為邦子曰行夏之時乘殷之輅服周之冕樂則韶舞

放鄭聲遠佞人鄭聲淫佞人殆

論語衛靈篇

朱子論語集註云夏以寅為人正商以丑為地正周以

子為天正然時以作事則歲月自當以人為紀故孔子

嘗曰吾得夏時焉余按上古之歷本始於子故歷法必

以冬至為歷元猶月之必始於朔日之必始於半夜也

其後聖人修明歷法區畫四時考驗中星晷影而冬至

乃在三冬之中。不可中分為二。且當閉藏之候。亦非發號施令所宜。故易而建丑。又易而建寅。但三代之世。三正並行。殷周之歷。其先皆有所授。相沿已久。故湯武革命。皆因之不改。猶徹之不始於武王。而始於公劉耳。初非以天地人分三正也。且孔子取夏時。固因其建寅。亦以其歷之密。觀春秋經傳所載。失閏者不一而足。日食不於朔者亦多。可知周歷之疎。不及夏也。第以為取其建寅。猶於聖人之意未盡也。

顏淵喟然歎曰。仰之彌高。鑽之彌堅。瞻之在前。忽然在後。夫子循循然善誘人。博我以文。約我以禮。欲罷不能。既竭吾才。如有所立卓爾。雖欲從之。末由也已。

論語子罕篇

漢人稱黃叔度為顏子。宋人亦以程伯淳擬顏子。余按

顏子所以幾於聖人者。其德之崇不待言。其於堯舜禹湯文武之道。亦必深有所見。故孔子以夏時殷輅周冕韶舞語之。非徒以蘊藉和平氣象雍容為勝人也。但其不幸早世。未及有所建白。使見用於世。必能移風易俗。創制顯庸。措天下於唐虞三代之隆。即不見用於世。而著書立說。發明孔子之道。亦必不在孟子之下。非他人所可望也。彼叔度者。吾不知其勝人者何在。即程子資穎學純。啟迪後學。非不有功於聖道。然所建白。皆尋常賢臣循吏之所能。此或因其位卑。不得盡其所長。而其持論教人。亦未見其可方孟子之二三也。然則二子者。不過以其蘊藉和平氣象雍容。故有此品題耳。寧顏子而僅如是已乎。蓋漢末之流風。漸尚氣度。至於魏晉。遂

專以風采度量權衡人物以至萬事不理而有劉石之禍宋亦頗有此風是以亦有靖康之亂也而宋以後儒者遂以周程張朱。姪之顏曾思孟其視顏孟亦太淺矣。夫顏孟下孔子一等耳。三代以下吾未見有如孟子者也。則亦必無能有如顏子者也。而乃紛紛擬之致聖賢之真。不白於天下。故附論之如此。

顏淵死。子曰噫。天喪予。天喪予。

論語先進篇

顏淵死。子哭之慟。從者曰。子慟矣。曰。有慟乎。非夫人之為慟而誰為。同上

顏淵死。門人欲厚葬之。子曰不可。門人厚葬之。子曰。回也視子猶父也。予不得視猶子也。非我也。夫二三子也。同上

附論○哀公問弟子孰為好學。孔子對曰。有顏回者好學。

不遷怒。不貳過。不幸短命死矣。今也則亡。未聞好學者也。

論語雍
也篇

附論○子謂顏淵曰。惜乎吾見其進也。未見其止也。

論語
子罕

篇

王充論衡書虛篇傳書或言顏淵與孔子俱上魯泰山。孔子東南望吳閭門外。有繫白馬。引顏淵指以示之。曰。若見吳閭門乎。顏淵曰。見之。孔子曰。門外何有。曰。有如繫練之狀。孔子撫其目而止之。因與俱下。下而顏淵髮白齒落。遂以病死。蓋以精神不能若孔子。強力自極。精華竭盡。故早夭死。世俗聞之。皆以為然。如實論之。殆虛言也。人目之視也。物大者易察。小者難審。使顏淵處閭門之外。望泰山之形。終不能見。况從泰山之上。察白馬。

之色不能見明矣。非惟顏淵不能見孔子亦不能見也。陸賈曰。離婁之明不能察帷薄之內。師曠之聰不能聞百里之外。閭門之與泰山非直帷薄之內百里之外也。秦武王與孟說舉鼎不任。絕脈而死。舉鼎用力。力由筋脈。筋脈不堪。絕傷而死。道理宜也。今顏淵用目望遠。目睛不任。宜盲眇。髮白齒落。非其致也。

附通論○子曰。回也。其心三月不違仁。其餘則日月至焉而已矣。論語雍也篇○子謂顏淵曰。用之則行。舍之則藏。惟我

與爾有是夫。

論語述而篇

○子曰。顏氏之子。其殆庶幾乎。有不

善。未嘗不知。知之未嘗復行也。

易繫辭下傳

○子曰。回之為人

也。擇乎中庸。得一善。則拳拳服膺而弗失之矣。

中庸

附通論○子謂子貢曰。汝與回也孰愈。對曰。賜也何敢望

回也。聞一以知十。賜也。聞一以知二。子曰。弗如也。吾與

女弗如也。

論語公冶長篇

○曾子曰。以能問於不能。以多問於寡。

有若無。實若虛。犯而不校。昔者吾友嘗從事於斯矣。

論語泰伯

篇

孟子書中。公孫丑稱冉牛閔子顏淵具體而微。自宋以來。多有顏曾並稱。皆若是班馬者。余按論語。哀公問弟子孰為好學。孔子對曰。有顏回者好學。不遷怒。不貳過。不幸短命死矣。今也則亡。未聞好學者也。哀公之問。在孔子歸魯之後。後此四五年而孔子即卒。果有可與顏子抗行者。孔子必舉以告哀公。明矣。孔子之言如是。則是孔子早有論定。顏子非他人所可及矣。顏子問仁。孔子曰。克己復禮為仁。一日克己復禮。天下歸仁焉。問為

邦。孔子曰。行夏之時。乘殷之輅。服周之冕。樂則韶舞。論語中有孔子以此等語言告他人者乎。然則非顏子不能及此矣。孔子稱閔子曰。夫人不言。言必有中。稱冉牛曰。斯人也。而有斯疾也。如是而已。至於顏子。則曰。用之則行。舍之則藏。惟我與爾有是夫。曰。回也。其心三月不違仁。曰。回也。其庶乎。曰。於吾言無所不說。曰。惜乎。吾見其進也。未見其止也。其稱顏子。至於如是。其與閔冉必有間矣。曾子稱孔子曰。江漢以濯之。秋陽以暴之。誠哉知聖人矣。然顏子稱聖人曰。仰之彌高。鑽之彌堅。曰。循循然。善誘人。曰。既竭吾才。如有所立。卓爾。雖欲從之。末由也已。較之曾子。其於聖道之淺深。亦必有辨矣。顏子卒。孔子曰。天喪予。天喪予。孟子曰。然而無有乎爾。蓋顏

子之造詣已深。假之以年。聖道不患其不昌明於世。不幸早沒。故孔子以為喪子。孟子以為無有也。由是言之。顏子所至。固非諸弟子所可班。故今於顏子獨表而出之。非敢於古聖賢。妄有所低昂於其間。誠篤信孔子之言。而不敢以己見參之耳。○顏子之事。與其問答之言。先後皆不可考。姑以事類約略次之如右。

曾子 **史記** 曾參。字子輿。

補

曾蒧。

論語作點。

字皙。

史記仲尼弟子列傳。

說已詳前顏子篇中。

論語先進篇。有曾皙與子路冉有公西華侍坐言志之事。余按此章。孔子問以何事答知已。故子路等三人所言。皆從政之事。風浴詠歸。於知我不知我何涉焉。且先